

Qujanaq, ataqqinartut innuttaasut, ataqqinartut qinikkat, ataqqinartuq Borgmester Ole Dorph

Saassinni nikorfavunga suliassamut tunniunneqartumut mianerinnilluga, qilanaarlugalu, qujassutigaaralu tatigaluta ingerlatsinissatsinnut toqqarsimagatsigut.

Ikaarsaariarnermut ataatsimiititaliamut ilaasortanngortut ilaquttasilu tamassi pilluaritsi. Suliassagut piviusuupput, amerlapput unammerlernarsinnaassallutillu, uagullu taakkuulluta sulisut ilagalugit suliassarissusaasavagut, nalunngilaralu suliassamut piareersimalluta, imaassinnaavoq piffissaq sivisooq naammassinninniarnermut ilaatigut atortarumaarlutigu, kisianni pisinnaasarput tamaat pitsaanerpaamik naammassiniartarumaarpagut ikioqatigiilluta isummallu assingiingissinnaaneri ataqqillutigit.

Aningaasaqarnermut inissisimanitta piumaffigivaatigut iliuuseqassasugut, aamma iliuuseqassuugut, sapiissuseqarluta suliffissanik nutaanik pilersitsiniassaagut siuariartortitsinissarlu siunnerfigalugu suleqatigiissalluta. Allannguerussuseqaratta allanngueqatigiissuugut siursaallutalu.

Ukiup uuma naanissaata tungaanut Qaasuitsumi kommunalbestyrelsi qimoqatigissavarput, massakkullu kommunalbestyrelsiusoq Borgmester Ole Dorph siuttoralugu ingerlasut qutsavigerusuppakka kommunip nutaanngortussap tunngavissai pitsaasumik toqqammavilersorluarmatikkit.

Kommuni nutaanngortussaq uagut ilusilersortussanngorparput, kommuni nutaarluinnaq innuttaasut taasitinneqarnermikkut piumasarissimasaat. Innuttaasut avitsinissamik piumasaqarnerminni tunngavigisaat uagut suliaralugit naammassiniartussaavagut. Innuttaasut oqartussaaqataarusunnerat tusaallugu suliaqassuugut, inoqarfinni tamani innuttaasut oqartussaaqataasutut ilusilersueqataasutullu inissisimanissaat suliarissavarput piffinni tamani oqartussaaqataanerup nukittorsarneratigut. Illoqarfinni aqutsisut pilersinneqassapput, nunaqarfinnilu aqutsisut pisussaaffilersorneqarnermikkut aningaasanik aqutaqalissapput, oqartussaaneq kommunalbestyrelsimit pisussaaffilersugaq ingerlatarissavaat, qitiusoqarfimmilu nutaaliorneq siunnersuineq nakkutilliinerlu ingerlanneqassallutik.

Innuttaasut kommunitsinni pinginneqataasutut tusaaneqartutullu inissisimanissaat suliassaavoq pingaaruteqarluinnartoq, aamma nalunngilara partiit tamarmik tamanna ataatsimoorfittut suleqatigiissutigiumaaraat.

Kommunissarput nunatsinni inuussutissarsiornikkut siuarsaanissamut periarfissanginnerpaatut taarusuppara. Ukiuni aggersuni kommunissatsinni massakut pioreersut saniatigut periarfissarpasuit ammaanpeqartussaapput, aalisarnerup tungaatigut suli periarfissat nutaat qulaajarneqaleruttorput. Qaanaap eqqaani, qimusseriarsuarmi, Upernaviullu avannaani aningaasarsiorfissat nutaat annertuut atorluarnissaat piorsaavigissavagut.

Aalisakkeriveqarfioreersuni unammilleqatigiinnerup suli annertusarnissaa sulissutigissavarput, piffinnilu tamani toqqorsiviit qerititsiveqarfiillu pinginnittut ilagalugit annertusarneqarnissaat anguniassavarput, uneqattaanngitsumik ingerlauarnissaq anguniarlutigu.

Ilulissani mittarfiup tallineqarneratigut takornariaqarneq annertuumik aningaasarsiornitsinnut sunniuteqartussaavoq. Unammilligassat tassaniipput imaannaanngitsut ilaatigut immaqa massakut takorloorsinnaanngisagut. Aningaasarsiornikkut suliffeqarnikkullu iluaqutinngortussaavoq annertuumik aamma tamanna siunertaraarput aamma nunaqavissut peqataatilluarnissaat anguniarlutigu piareersarnerit ingerlatissuagut.

Sanaartornerit annertuut mittarfiup piariinnginnerani aamma piareernerata kingornatigut sularineqartussaapput, Ilulissani illoqarfik annertuumik piorsarneqassooq, innuttaasut amerligaatsiarnissaat natsorsuutigaarput taamaattumik illuliortitsinerit ingerlanneqassapput, aqqusineqarnikkut aqqissuussisoqassooq, takornariarpassuarnullu tikittussanut ornitassatigut akunnittarfitsigullu neriniartarfitsigullu annertusaanissaq aamma ingerlanneqassooq. Takornarissat nunaqavissunik sullinneqarsinnaanissaat anguniarlugu aammalumi takornariaqarfiit akunnittarfiillu naammattunik sulisoqarnissaat anguniarlugu takornarissanut sullissinermut ilinniarfiusinnaasumik kommunitsinni pilersitsinissaq anguniassavarput.

Piorsaanissat annertuut pilersarusiorneqarnerat massakut ingerlanneqareerpoq kisianni suli annertunerusumik sukkanerusumillu piareersartariaqarpugut maani



Ilulissaniinnaangitsoq, avannaani piffinni tamani aamma piorsaanerit piareersarnerillu ingerlanneqassapput, taamaattumik sulisussanik qulakkeerinninnissaq ersarissumik politikkiliussallutigu pisussaaffigaarput, massakkummi avataaniit sulisussanik tikisitsisarneq ingerlanneqalereerpoq aamma siunissami tamanna annertunerusumik pisinnaanera naatsorsuutigissavarput. Sulisussat pikkorissartinneqarnissaannut piareersarneqarnissaannullu periarfissat taamaasa ujartuiffigisariaqarpagut, ilinniarfiit nunatsinniittut nunanilu allaniittut periarfissat ujartortariaqarpagut, sulisinnaasut tamaasa sulisilertariaqarpagut, inuit sulisinnaasut amingaatigineqarnerat annertusiartuinnassangipput.

Kommunitta siunissami ilisarnaataasa ilagisariaqarpaat kommuni inuussutissarsiutinik aallartitsiniartunut tikilluaqqusisuunera. Kommunerput suliffeqarfinnik pilersitsiviginiarlugu periarfissiisuussaaq tikilluaqqusisuullunilu avataaniillu aningaasaliiniartunut orniginartuussalluni. Kommuni suliffigissallugu pilerinartuussaaq orniginartuullunilu.

Susassareqatigiinneq kivitseqatigiinnerlu ingerlanitsinni ingerlatitsiniarnitsinilu nukittoqutaammata taakkua qitiutissavagut. Inuiattut aaqqissuussaanitsinni ikioqatigiinneq immitsinnullu susassareqatigiilluta ikioqatigiillutalu ingerlatsimanerput napatitsisorisimavarput massakkulli soorluuna tamanna tammariartulersimasoq, inuk nammineerluni pisariaqartitani kisiisa aallaavigalugit ingerlaniarsarilersimavoq, tamanna ilaatigut tupinnarpallanngilaq, tassami taamatut eqqarsarluni ingerlatsineq nunani assersuuttakkatsinni tunngavigalugu ingerlatsisoqarmat ullullu tamaasa tusartuarparput ilinnut isumagiguit tassa naammappoq, isumaqarpungali taassuma tungaatigut eqqarsaqqittariaqartugut.

Peqatigiiffilerinermik ingerlatsineq, nunaqarfeqatigiilluni illoqarfeqatigiillunilu aliikkusersuinerit, timersornikkut unamminerit, qimussimik sukkanniuunnerit, tassaapput inuiattut ataatsimoorfittut pingaaruteqarluinnartut tamakkuninngalu ingerlatsisut piffissarujussuaq atorlugu susassareqatigiinnermik annertuumik sulissuteqartarput, tassalu taakkuupput paarisassagut tapersersugassagullu. Tamaattumik ataatsimoornerup ilisareqatigiinnerullu annertusarneqarnissaanut suliniutit ingerlatissavagut, avannaani innuttaasut kulturikkut inooriatsimikkullu assingiinneqisut imminnut ilisareqatigiinnissat anguniarlugu, kulturikkut

nipilersornikkut timersornikkullu suliniutinik ingerlatsisalernissat aqqutissiuunneqassapput.

Eqqaamasarpakka atuarfeqarfiit siornatigut sutigut tamatigut peqatigiiffeqarnikkut aliikkusersuinikkut innuttaasullu katersuunnerannut qitiusut, tamakkua ileqqutoqqat iluatinnartut utersaartissinnaanerit misisorneqartariaqarpoq tassami illuuterpassuagut innuttaasunik atorluarneqarsinnaanerit periarfissarsiuutariaqarparput. Sunngiffimmi pinaveersaartitsinermilu sulinermit atuarfeqarfiit atorluarsinnaanerit massakkorniit annertunerusumik periarfissaassaaq.

Atuarfeqarfitta pitsanngorsarneqarnissaa tamatta sulissutiginiarlugu qineqqusaarnitsinni eqqartorparput aamma tamanna pimoorullugu suliarissavarput, kommunitisinni siammaseqisumi teqeqqut tamaasa alakkarternissaat ajornakusoorsinnaavoq, kisianni uani suliami suut tamaasa qulaajarneqarsinnaasut atorlugit pitsanngorsaanissatsinnik pisussaaffeqarpugut, anguniassavarput inuusuttut atuarfimmiit aningaagamik ingerlaannaq ingerlariaqqiffissanut alloriaqqinnissaminnut piareersimanissaat, immaqqa anguniagaq annertugineqarsinnaavoq kisianni pisariaqarpoq. Massakkut qulaajaanerit pisorta qarfinniit ingerlanneqartut nalunaarutillu saqqummereernikut uagullu nammineq misilittakkagut atorlutigit, iluatsitat sanngeequtillu qulaajarlutigit, atuarfeqarfitta pitsanngorsarnissaa suliarissavarput.

Inuit isumaginninnikkut sullinneqarnerit pitsaassutsimigut qaffasinnerpaanissaa anguniassavarput. Meeraguit inersimasuuguit utoqqaguilluunniit kommunitisinni najugaqarfiit apeqqutaatinnagu pitsaassutsimik annerpaamik eqaattumillu sullinneqarsinnaanissat pissarsiarisassagit uagut qinikkatut anguniartussaavarput tamannalu pingaartillugu sulinerput ingerlatissavarput. Kommunitisinni Meeqqat inuusuttullu toqqissimasumik inuuneqarnissaat anguniarlugu pilersarusiortoqassaaq qinigaaffiit marluk akimorlugit. Meeraq ataaserlunniit atornerlunneqassanngittoq angusariaqarparput taamaattumik ilaqutariit ataasiakkaat qanimut suleqatigalugit nikisitseriarnissaa anguniarlugu suliniutissanik pilersaarutinillu ersarissunik siunnerfeqassaagut. Kommunitisinni meeqqanik suminginnaanerit annertuallaaqaat angajoqqaausugut akisussaaffigaarput meeqqatta toqqissimasumik peroriartortinnissaat, akisussaaffippullu



ilisimaarisariaqarparput, pisortat kisimik isumalluutinngortarnerat ajorpoq akuersaaruminaallunilu.

Una qaqinniagara tullinnguuttoq assut eqqarsaatigisimavara ullormut taama pingaartorsiornartigisumut pissusissamisussanersoq qaqissallugu, aalijangerpugalu qaqinnissaa pisariaqartoq.

Inuianguatut namminiilivikkusuttut tupinnaannartumik uatsinnut sanngiillisartuarpugut, ingutsineq, nakkarsaaneq, kamak, ileqqupalaaraagut ajornartorsiutigalugillu, arlaat isummerpat imaluunniit angusaqarpat kisianniuna oqaatsit annernarsinnaasut atorlugit appisaluutipallallutigu.

Ileqqorissaartorpassuaqaraluartoq atungaavallaqaaq tamanna, tassuuna eqqarsaqqittariaqarpugut imaassanngilarmi akerlerisaq oqaatsit annernartut atorlugit appisaluukkutsigu imminut iluarisimaassasugut. Tamanna sanngeequterput ingerlariaqqinnissaraluatsinnullu aporfipput illuanut saatinniartariaqarparput, nersorinnissinnaaneq angusaqarluartunullu tulluusimaarinnissinnaaneq atornerusariaqarparput, qanorluunniit qalipaateqaralarutta oqaaseqaralaruttaluunniit inuiaqatigiinnut tunniusaqarluta suliaqarutta tamatta atorfissaqartinneqartutut misigisimasariaqarpugut.

Kommunissarput tassaasariaqarpoq suliarforfigissallugu pilerinartooq orniginartorlu. Kommunimi sulisut tatigalutigit suleqatigalugit ingerlaqatigisariaqarpagut, kommunimi sulisut toqqissisimasut namminnerlu isummersorsinnaasut isornartorsiusinnaasullu pisariaqartippagut. Sulisut aaqqissuussaannermut pittannguutaasinnaasunik oqalliseqaataasut aamma pisariaqartippagut. Allaffissornikkut suleriaatsit eqaallisarneqarnissat sulissutigissavarput, innuttaasut sumikkaalarunilluunniit kommunimut saaffiginnikkunik sullilluarneqarnissat anguniarlugu. Anguniarparput sullinneqartut sullinneqareeraagamik naammagisimaarinnillutik ikiorneqarsimasutut ilitersuunneqarsimasutut misigisimanissaat.

Sulisut peqatigalugit kommunitsinni sulisuuneq pitsanngorsassavarput pilerinarsarlugulu, kommunitsinni sulisuuneq nuannersuussaaq unammillernartuulluni toqqissisimanarlunilu. Manna iluatsillugu inuusuttut ilinniarluarsimasut kaammattorusuppakka kommunitsinnut suliarooqqullugit, tassami kommunip nutaarluinnaap ilusilersorneqarneranut

peqataatikkusunnaqigassi aamma periarfissaassammat qaffasinnerusunut atorfinnut ingerlariaqqissinnaanerit.

Innuttaasut atukkamikkut ilungersunartumik atugaqartut imaluunniit napparsimalersimallutik inuunerminnik namminneq pisuussutigingisaminnik allannguisariaqalersimasut pitsaanerusumik sullinneqarnissaat pisariaqarpoq. Massakkut tamakkuninnga eqqugaasimasunut sullisseriaaserput misigittaappallaaqaaq, nalilersuilluartariaqarpugut tassuuna, inuit misigissutsimikkut sanngiillereersut suli oqimaarsaatissaannik tuneqqittarpagut, tassuuna sulissinitsigut pikkorinnerusariaqarpugut, tamannalu pillugu partiit tamatta suleqatigiilluta iliuuseqarnissarput pisariaqarpoq.

Inuusuttatta inuiaqatigiit ingerlanneqarnerannut peqataatinneqarnissaat suliffissaqartinneqarnissaallu pisussaaffigaarput. Massakkut inuusuttorpassuit unittooqqasut iliuuseqarfiginiarlugit suliniutit ingerlanneqartut suli annertunerusumik ingerlanneqartariaqarput. Inuusuttut ingerlariaqqinngittoorsimasut amerlavallaaqaat, akissaqanngilagut uninngatiinnarnissaannut. Inuusuttunut suliniutit piffinni allani iluatsittut, soorlu Timi asimi allallumi nunatsinni ingerlanneqartut, atorluarnerisigut inuusuttut inuiaqatigiinnut peqataateqqilernissaat aqutissiuunneqartariaqarpoq

Meerartatta inuusuttortattalu atugaat pillugit oqallinneq annertoq pisariaqartorlu ukiuni kingullerni ingerlanneqarpoq. Meeqqat angajoqqaaminnik suminginnagaasut tusartuarpagut, meeqqallu ajoraluartumik kinguaassiutitigut atornerlunneqartarnerat aamma tusartarlutigu.

Pisortaniit nukippassuit aningaasarpassuillu atorpagut ilungersorluta aaqqiiniaraluarluta, kisianni suli taamaattoqartuarpog. Allaat meeqqat angerlarsimaffiiniit qimaguttittariaqalersarpagut meeqqat illersorniarlugit, uteqqissavara meerartaarsimagutta uagut meeqqatta toqqissisimasumik angerlarsimaffeqarnissaat toqqissimasumillu alliertortinneqarnissaat angajoqqaatut akisussaaffigaarput. Imigassamik atueriaaserput, ikiaroorartumillu ajornartorsiuteqarnerput, aningaasanoorerillu peqqutaanerpaasarput meeqqat suminginnangaanerannut. Meeqqat toqqissisimasumik inuuneqarnissaat anguniarlugu inuunitsinnik allannguisariaqarpugut, tamattalu ikioqatigiilluta maligassiuilluta allannguinissaq anguniartariaqarparput.

Nunarput meerartatsinnut toqqissisimanartunngortitsigu uatsinnut piumaffigaluta meerartatsinnut maligassiuiniarluta nuannaartunartuuniarluta suleqatiginniarlutalu, upperitigu ataatsimoorutta uatsinullu piumaffigigutta allanngueqatigiissinnaalluta.

Ikaarsaariarnermut ataatsimiititaliamut ilaasortanngortut tamassi suleqatiginissarsi qilanaaraara aamma nalunngilara suliassaaleqinaviarnata.

Kommunitsinni innuttaasut ajunnginnerpaamik kissaappakka neriorsussavassilu pinginnaasagut tamaasa atorlugit sullissilluarnissaq anguniassagatsigu.

Qujanaq.